

Penyata Pengerusi kepada Pemegang Saham



Tun Mohamed Dzaidin Haji Abdullah

Tun Mohamed Dzaidin Haji Abdullah
Pengerusi

Para Pemegang Saham,

Tahun 2013 merupakan tahun di mana bursa di seluruh dunia terpaksa berdepan dengan ketidaktentuan kewangan dan persaingan yang semakin sengit. Di sebalik latar belakang yang tidak menentu ini, Bursa Malaysia telah berjaya melangkah ke hadapan untuk mencatatkan prestasi yang memberangsangkan dalam pelbagai bidang. FBM KLCI telah mengakhiri tahun dengan 1866.96 mata, naik 10.5% daripada 2012.

Bursa Malaysia mengatasi bursa-bursa setaraf lain dalam prestasi penanda aras dan merupakan destinasi penjanaan dana yang terbesar di ASEAN dengan jumlah terkumpul sebanyak USD7,046.9 juta. Dan yang paling penting, kami terus mewujudkan nilai pemegang saham dengan memberikan jumlah pulangan pemegang saham sebanyak 40.7%.

Kedudukan baik kami setakat ini adalah hasil daripada usaha berterusan untuk mengukuhkan infrastruktur pasaran kami dan kedudukan Bursa Malaysia sebagai cadangan pelaburan yang menarik. Tahun ini telah menyaksikan kami meningkatkan langkah usaha urus tadbir, memberikan nilai pemegang saham yang baik, dan berjaya melaksanakan langkah-langkah untuk membantu kami menerokai kesempatan di dalam bidang-bidang baharu. Dalam proses Bursa maju ke hadapan, asas-asas telah kini mantap untuk menyerlahkan lagi potensi pasaran kami dan benar-benar menggerakkan kami menuju ke tahap kejayaan yang seterusnya.

KOMITED TERHADAP KETELUSAN DAN KESTABILAN PASARAN

Struktur pasaran global dan rangka kerja pengawalseliaan yang sentiasa berubah agak kurang menyenangkan pengusaha pasaran pada beberapa tahun kebelakangan ini. Namun, di tengah-tengah suasana ini, Bursa Malaysia terus mengorak langkah ke hadapan dalam usaha untuk memastikan pasaran yang teratur, telus dan cekap. Tahun 2013 menyaksikan kami terus mengemaskinikan peraturan kami dan menambahbaik rangka kerja pengawalan dan penyeliaan sedia ada kami yang berkesan, untuk memastikan pendekatan pengawalseliaan yang menyeluruh.

Untuk melahirkan amalan tadbir urus korporat yang lebih baik di kalangan syarikat-syarikat tersenarai awam dan juga membantu lembaga-lembaga pengarah mengemudi syarikat masing-masing ke arah pertumbuhan perniagaan yang mampan, kami telah mengeluarkan edisi kedua Panduan Tadbir Urus Korporat: Ke Arah Kecemerlangan Lembaga Pengarah. Bagi memantapkan pendidikan dan penglibatan pemegang kepentingan, kami telah mengendalikan 22 sesi pertemuan, termasuk Siri Pengerusi yang eksklusif.

**TAHUN INI
MENYAKSIKAN KAMI
MENINGKATKAN
LANGKAH USAHA
TADBIR URUS,
MEMBERIKAN
NILAI PEMEGANG
SAHAM YANG BAIK
DAN BERJAYA
MELAKSANAKAN
LANGKAH-LANGKAH
UNTUK MEMBANTU
KAMI MENEROKAI
KESEMPATAN DALAM
BIDANG-BIDANG
BAHARU**

Penyata Pengerusi kepada Pemegang Saham

MEMACU NILAI PEMEGANG SAHAM YANG BAIK

- **PERTUMBUHAN 13%
DALAM HASIL OPERASI DAN
PERTUMBUHAN 15%
DALAM PATAMI**

- **KADAR HASIL
DIVIDEN SEBANYAK
6.3%**

- **PENGIKTIRAFAN DARIPADA
MSWG:**

- ✓ **ANTARA 5
TERBAIK BAGI TADBIR
URUS KORPORAT
KESELURUHAN**

- ✓ **ANTARA 3
TERBAIK BAGI
KETELUSAN TADBIR URUS
KORPORAT**

- ✓ **1 DARIPADA 3
PEMENANG
AMALAN MESYUARAT
AGUNG TAHUNAN
TERBAIK**

Kami tetap komited untuk melaksanakan amalan terbaik tadbir urus korporat di segenap organisasi kami. Pada 2013, Bursa Malaysia telah diumumkan sebagai salah satu daripada tiga pemenang Anugerah Amalan Mesyuarat Agung Tahunan Terbaik daripada Badan Pengawas Pemegang Saham Minoriti (MSWG). Kami juga merupakan antara penerima Anugerah Ketelusan Tadbir Urus Korporat Ke-3 Terbaik dan Anugerah Tadbir Urus Korporat Keseluruhan Ke-5 Terbaik MSWG. Anugerah-anugerah tersebut memantapkan komitmen kami untuk mengamalkan kepimpinan melalui teladan dalam bidang tadbir urus.

KOMITED TERHADAP PEWUJUDAN NILAI PEMEGANG SAHAM YANG BAIK

Tahun 2013 juga menyaksikan kami terus mengukuhkan asas untuk meningkatkan kualiti pasaran, memastikan kemampunan dan menyerlahkan potensi Bursa sepenuhnya. Kami telah meningkatkan kualiti perkhidmatan dan penawaran produk kami, menambah pelaburan bagi kakitangan dan teknologi, serta mempertingkatkan hubungan dengan pihak berkepentingan.

Hasil daripada usaha keseluruhan pasukan kami, kami mencatatkan prestasi kewangan yang teguh untuk 2013 dengan peningkatan hasil operasi sebanyak 13% dan PATAMI sebanyak 15%.

Komitmen kami untuk mewujudkan nilai pemegang saham yang baik kekal menjadi keutamaan kami. Dasar kami adalah untuk membayar balik tidak kurang daripada 75% daripada PATAMI kami. Sejak penyenaian, kami telah melepasi kadar ini dan telah memberikan ganjaran kepada pemegang saham pada kadar lebih daripada 90% daripada PATAMI kami. Selaras dengan prestasi yang baik pada tahun ini, kami mencadangkan pembayaran dividen akhir sebanyak 16 sen. Cadangan ini, digabungkan dengan dividen interim sebanyak 16 sen yang telah dibayar kepada para pemegang saham dalam tahun 2013, berjumlah 98% daripada PATAMI kami. Kami juga telah membayar dividen khas sebanyak 20 sen pada bulan Ogos 2013, menjadikan jumlah dividen sebanyak 52 sen.

KOMITED UNTUK KEKAL RELEVAN

Sebagai bursa yang bersepadu dan pemangkin bagi pasaran modal Malaysia, kami berazam untuk kekal relevan kepada pemegang kepentingan kami serta memacu pertumbuhan yang mampan. Kemunculan Komuniti Ekonomi ASEAN (AEC) pada akhir 2015 merupakan petanda baik untuk kami. Sebagai "Pasaran Multinasional ASEAN", Bursa Malaysia berkedudukan baik sebagai pintu masuk pilihan dan pasaran utama bagi pelabur untuk melabur dalam pasaran ASEAN.

Kami juga fokus dalam menawarkan pelbagai produk dan perkhidmatan yang meluas dan mampan kepada pemegang kepentingan kami. Penawaran pasaran Islam global kami terus menjadi peluang pelaburan yang berdaya maju dan telah menyokong kedudukan kami sebagai salah satu bursa utama di Asia untuk tawaran produk Islam. Pelancaran Kontrak Niaga Hadapan Emas dan sekuriti tercantum juga telah memperluaskan rangkaian produk kami.

Ketika kami maju ke hadapan, Bursa Malaysia akan terus menjuarai amalan tadbir urus yang baik, melancarkan strategi pertumbuhan baharu dan mencari peluang di bidang-bidang baharu. Kami yakin dengan potensi kami pada masa akan datang berdasarkan asas-asas kukuh yang telah dibina.

PENGHARGAAN

Bagi pihak Lembaga Pengarah, saya ingin mengambil kesempatan ini untuk menyampaikan ucapan terima kasih kami kepada para pemegang saham atas sokongan teguh yang telah diberikan kepada Bursa. Terima kasih juga kepada pihak pengawal selia dan penggubal dasar di atas usaha yang sungguh berharga dalam menetapkan garis panduan yang jelas bagi menggalakkan keberkesanan dan ketelusan pasaran. Ucapan terima kasih juga kepada para Pengarah atas pandangan yang arif dan dalam membantu Bursa kekal bersemangat di tengah-tengah suasana yang tidak menentu. Akhir sekali, saya ingin merakamkan setinggi-tinggi penghargaan kepada kakitangan Bursa Malaysia di atas kesetiaan, pengorbanan dan komitmen kepada kecemerlangan yang telah membawa kami ke tahap ini.